

Friday, April 24, 2026

Time - 2:30pm - 2:35pm

**AKASHVANI AIZAWL
REGIONAL NEWS UNIT**

**REGIONAL NEWS BULLETIN
(MIDDAY)**



RTI

Mizorama RTI lama thuneitusang ber, Mizoram Information Commission in MUHCS chungchanga Mizoram State Healthcare Society (MSHCS) leh Synod Hospital inremna RTI Act hmanga diltu hnena pe chhuak tura a hriattirna chu MSHCS-in Gauhati High Court-ah a khing a, Mizoram chanchinah state sorkar hnuai ve ve court-a an inkhin hmasak ber tum nia hriat a ni.

Mizoram Information Commission full bench chuan Advocate Pu J Malsawmzuala'n RTI hmanga Mizoram Health Care Society hnena MUHCS chungchanga Synod Hospital, Durtlang nena an inremna an ziah copy leh detail pricing a dil, an pek theih loh avanga zualko na chungchangah tun thla April ni 9 khan hearing neiin, a thil dil chu April ni 17 hmaa pe turin MSHCS SPIO chu thu a pe a ni. Mizoram HealthCare Society chuan he thupek hi ngaihtuah nawn leh turin April ni 20 khan Information Commission a ngen a, hetihlai hian Information Commission chuan RTI danah ngaihtuah nawn leh theihna a awm loh thuin a chhang a. Mizoram Health Care Society chuan Gauhati High Court-ah motion pu lutin MIC-in MSHCS leh Synod Hospital inremna pe tura a hriattirna chu stay a dil a, April ni 22, Nilaini khan Gauhati High Court- Aizawl Bench-ah ngaihtuah niin, stay a dilna hi a pawmsak a, thlaleh May ni 18 khian High court chuan a ngaihtuah leh dawn a ni.

Hemi chungchangah hian Akashvani News Aizawl chuan MUHCS a be pawp thei lova, Mizoram Information Commission lam chuan High court atangin engmah an la dawng rih lo tih Akashvani News Aizawl an hrilh a, RTI thehluttu Advocate Pu J Malsawmzuala chuan MUHCS chungchanga sorkar leh Synod hospital inremna piah lamah Mizoram leh Mizoram pawn damdawi in te nena an inremna te pawh sorkarin a thup tlat a, MLA te pawhin Assembly House-ah an zawt chhuak thei lo a ti a. Langtlang taka MUHCS kalpui chu mipui zawng zawng tan a that ber laiin, langtlang lo tura sorkarin a chakna zawng zawng hmanga High Court hial a thleng duh chu vanduaithlak a tih thu a sawi a ni.



KHAWZAWL KVK

KVK Khawzawl training hall-ah vawiin khan thlai chi semna hun hman a ni a. He hun hi Senior Scientist & Head Dr. Malsawmkimi chuan kaihuaaiin, Chawngtlai leh Neihdawn khua atanga kuthnathawktu thlan bik, hma la zau tur mi 43-te hnenah thlai chi tha an lo hriat tawh te - Hmarchapui, Bawkbawn leh Bawrh Saiabe chi leh a enkawl na tur Indian Institute of Horticultural Research (IIHR-NEH) Scheme hnuai atangin pek chhuah an ni.

He hunah hian Pi R. Vanlalduati, Subject Matter Specialist (Soil Sc.) chuan kalkhawmte hnenah an thlai chinte leitha an pek danah fimkhur tura chahin, leitha inbuk tawh lo pekin leilung a khawih pawh theih dan leh leitha pek dan dik lovin thlai leh leia a nghawng thalo te, leitha inbuk tawh pek a pawimawhzia leh biofertilizers hman tul tawh zia leh thlai tana an tangkaina hrang hrang kuthnathawktu kalkhawmte a hrilh a ni.



KOLASIB DIST CLEANLINESS

'Kolasib District Fai Bul Tanna' chu vawiin khan Kolasib DC Office-ahnatlang kovin faihna beihpui an thlak a, He faina hnatlangpui hawnna inkhawm tawi hi Additional Deputy Commissioner (ADC) Pi B. Malsawmtluangi chuan a kaihuaai a ni.

He hunah hian Kolasib Deputy Commissioner Pu H. Dolianbuaia chuan thu sawiin, Kolasib chu Mizorama khaw fai ber nihna hauh tuma hma lak a nih thu leh, chu faina beihpui chu hmun dang atanga tan lovin anmahni ngeiin DC office atanga bul an tan thu a sawi a. Faina beihpui thlak hi thla thar May-ah chuan khawtlang huapa kalpui turin Village Council (VC) leh YMA te nen thawhho a ni dawn a, October thlaah chuan ngawrh taka hmalakna a kalpui a nih dawn thu a tarlang.

DC chuan faina chu nunpui a, kan thinlungah fai duhna rilru put a pawimawh zia sawiin, mahni office leh thawhna hmun theuhte vawng fai turin a chah .

